

Imani Sahili Inatuunganisha na Mungu,

Nanyi jibesabuni kuwa wafu kwa dhambi, na walio hai kwa Mungu katika Kristo Yesu. Warumi 6:11.

Tunaishi katika wakati muhimu sana katika historia ya dunia hii. Hakuna kabisa nafasi ya kutenda dhambi; mara zote ni hatari kudumu dhambini; lakini jambo hili ni la kweli, kwa namna ya pekee, katika wakati wa sasa. Kwa sasa tupo katika kingo za ulimwengu wa milele na tunasimama katika uhusiano makini zaidi na wakati pamoja na umilele kuliko ilivyowahi kuwa. Sasa hebu kila mmoja na auchunguze moyo wake na kuomba kwa ajili ya miale angavu ya Jua la Haki kufukuza giza lote la kiroho na kutakasa uchafu wote. “Tukiziungama dhambi zetu, Yeye ni mwaminifu na wa haki hata atuondolee dhambi zetu, na kutusafisha na udhalimu wote.” Kwa imani, bila kuangalia hisia, Yesu, Mwanzilishi wa wokovu wetu, Mtimizaji wa imani yetu, kwa neema Yake ya thamani, ataimarisha nguvu za maadili na mwenye dhambi atajihesabia mwenyewe “kuwa wafu kwa dhambi, na walio hai kwa Mungu katika Kristo Yesu.” Imani sahili, pamoja na upendo wa Kristo wa moyoni, vinamuunganisha muumini na Mungu. Wakati akipambana vitani kama askari mwaminifu wa Kristo, anapata msaada kutoka kwa ulimwengu mzima. Malaika wahudumu wanamzunguka kote ili kumsaidia katika pambano, ili kwamba aweze kusema kwa ujasiri, “Bwana ndiye mchungaji wangu” “Bwana ni nguvu zangu na ngao yangu”; sitashindwa. “Mmeokolewa kwa neema, kwa njia ya imani; ambayo hiyo haikutokana na nafsi zenu, ni kipawa cha Mungu.”

Hekima na nguvu za Mungu visivyo na ukomo vinatumika kwa niaba yetu. Jeshi la mbinguni kwa hakika linapigana vita vyetu kwa ajili yetu. Mara zote hutazama kwa umakini mkubwa roho zilizounuliwa kwa damu ya Mwokozi. Kupitia kafara ya Yesu wanaona thamani ya roho ya mwanadamu. Ni salama kuwa upande wa Bwana siku zote, si kwa shingo upande bali kwa moyo wote. Ni kazi hii inayofanywa kwa shingo upande, kutojali na kizembe inayotenganisha roho zenu na Yesu, chanzo cha nguvu zenu. Hebu hili liwe ombi lako: “Chukua vyote kwangu, hebu nipoteze mali, heshima ya kidunia na kila kitu, lakini uwepo Wako uwe pamoja nami.” Ni salama kusalimisha utunzaji wa miyo yetu kwa Mungu, ambaye anatawala juu ya mbingu na nchi (Testimonies to Ministers and Gospel Workers, 147, 148).

Tunatakiwa kufanya toba kamili, kumwamini Yesu Kristo Mwokozi wetu, kuwa waangalifu, kuomba bila kukoma na kujitahidi katika kusoma Maandiko. Mungu atatuwajibisha kwa yale yote tunayoweza kuwa ikiwa tutaweza kukuza talanta zetu... mivuto yetu yote ni mali ya Mungu. Kila tulichopata kinapaswa kutumika kwa utukufu Wake. Kila rasilimali ambazo Bwana ameziweka kwetu zinapaswa kupelekwa madhabahuni pa Mungu, kurudishwa Kwake tena. Tunafanyia kazi hatima zetu wenyewe. Mungu atusaidie sote ili tuwe na hekima kwa umilele (Testimonies to Ministers and Gospel Workers, 147).